



GARIS PANDUAN

SIRI 3

- **PENYEMBELIHAN TERNAKAN KORBAN**
- **PELAKSANAAN IBADAH KORBAN**
- **PENGELUARAN, PENYEDIAAN, PENGENDALIAN DAN PENYIMPANAN MAKANAN HALAL**
- **UBAT-UBATAN DALAM ISLAM**
- **PELAKSANAAN IBADAH DI INTERNATIONAL SPACE STATION (ISS)**

GARIS PANDUAN (SIRI 3)

Panduan Sembelihan Qurban
Panduan Pelaksanaan Ibadah Qurban
Panduan Mengenai Pengeluaran, Penyediaan, Pengendalian dan
Penyimpanan Makanan Halal
Panduan Kawalan Ubat-ubatan dalam Islam
Panduan Pelaksanaan Ibadah di International Space Station

Cetakan Pertama 2015

Hakcipta terpelihara. Tidak dibenarkan mengeluarkan mana-mana bahagian penerbitan ini dalam apa jua bentuk yang boleh diperolehi semula atau disiarkan dalam sebarang bentuk dengan apa cara, elektronik, mekanikal, fotokopi, rakaman @ sebaliknya tanpa mendapat keizinan daripada penerbit.

Susunan:

Bahagian Fatwa

<http://mufti.penang.gov.my>

Diterbitkan oleh:

JABATAN MUFTI NEGERI PULAU PINANG

Tingkat 48, KOMTAR, 10000 Pulau Pinang

Tel: 04-263 2975 Faks: 04-263 2985

NASKHAH PERCUMA

Senarai Kandungan

GARIS PANDUAN SEMBELIHAN KORBAN	5
1. PENGENALAN	5
2. OBJEKTIF	5
3. UNDANG-UNDANG DAN PERATURAN	6
4. KEBAJIKAN HAIWAN	7
5. PENYEMBELIHAN TERNAKAN KORBAN	9
6. PENGURUSAN SISA TERNAKAN KORBAN	11
7. KESEDARAN AWAM	11
8. PEMANTAUAN OPERASI PENYEMBELIHAN KORBAN	12
9. RUJUKAN	13
GARIS PANDUAN PELAKSANAAN IBADAH QURBAN	17
10. BAHAGIAN 1: TATACARA PELAKSANAAN IBADAH QURBAN	17
11. TAFSIRAN	17
12. HIKMAH IBADAH QURBAN	18
13. HUKUM BERQURBAN	18
14. JENIS QURBAN	19
15. STATUS HUKUM DAGING QURBAN	19
16. PEMBAHAGIAN DAGING QURBAN	19
17. INDIVIDU YANG DITUNTUT MELAKUKAN IBADAH QURBAN	20
18. SYARAT SAH BERQURBAN	21
19. TEMPOH DAN MASA BERQURBAN	21
20. SYARAT SAH HAIWAN TERNAKAN UNTUK QURBAN	22
21. SYARAT PENYEMBELIH HAIWAN QURBAN	23
22. SYARAT SAH SEMBELIHAN	23
23. SYARAT ALAT MENYEMBELIH	23
24. PERKARA SUNAT KETIKA BERQURBAN	24
25. PERKARA MAKRUH KETIKA BERQURBAN	24
26. CARA MENYEMBELIH HAIWAN QURBAN	25
27. AGIHAN DAGING QURBAN	27
28. BAHAGIAN 2: PENGURUSAN QURBAN	29
29. TAFSIRAN	29

30. PIHAK WAKIL MELANTIK WAKIL LAIN (TAWKIL) MELAKSANAKAN QURBAN	29
31. LAFAZ NIAT WAKALAH UNTUK PELAKSANAAN QURBAN	30
32. PERKARA YANG MESTI DIKETAHUI SEBELUM MEWAKILKAN URUSAN QURBAN	31
33. PENGURUSAN QURBAN OLEH PERSATUAN, AGENSI ATAU SYARIKAT DALAM NEGARA. 31	
34. PENGURUSAN QURBAN OLEH PERSATUAN, AGENSI ATAU SYARIKAT LUAR NEGARA	31
35. PENYERAHAN WANG KEPADA WAKIL BAGI QURBAN DI LUAR NEGARA.....	32
36. QURBAN YANG BERCAMPUR DENGAN AQIQAH, HADIAH, NAZAR DAN SEMBELIHAN BIASA	32
37. PEMBERIAN HAIWAN QURBAN OLEH ORANG PERSEORANGAN, PERSATUAN, ATAU AGENSI	33
38. PEMBERIAN HAIWAN QURBAN OLEH ORANG BUKAN ISLAM.....	35
39. PENUTUP	35
GARIS PANDUAN MENGENAI PENGELUARAN, PENYEDIAAN, PENGENDALIAN DAN PENYIMPANAN MAKANAN HALAL	38
40. KEPUTUSAN:	38
GARIS PANDUAN BERSAMA KAWALAN UBAT-UBAT DALAM ISLAM.....	40
41. PENDAHULUAN	40
42. DEFINASI HUKUM SYARAK DAN UBAT YANG HALAL	42
43. DEFINISI UBAT	42
44. DEFINISI UBAT YANG HALAL.....	43
45. SUMBER UBAT.....	43
46. PENUTUP	51
GARIS PANDUAN PELAKSANAAN IBADAH DI INTERNATIONAL SPACE STATION, ISS (STESYEN ANGKASA ANTARABANGSA)	53
47. TUJUAN	53
48. PENGENALAN.....	53
49. PELAKSANAAN IBADAH DI ISS	54
50. HAL-HAL BERKAITAN	56
51. PENUTUP	57



**GARIS PANDUAN
SEMBELIHAN
TERNAKAN
KORBAN**

GARIS PANDUAN SEMBELIHAN KORBAN

1. PENGENALAN

Ibadah korban adalah ibadah sunat yang dituntut oleh agama Islam. Ianya dilakukan dengan menyembelih ternakan korban pada Hari Raya Aidil Adha (10 Zulhijjah) dan Hari-hari Tasyrik (11,12 dan 13 Zulhijjah). Pada lazimnya, di Malaysia penyembelihan ternakan korban ini dilakukan di masjid, surau, padang awam, balai raya dan rumah persendirian.

Justeru, satu langkah penyelarasan aktiviti penyembelihan ternakan korban perlu dilaksanakan dengan kerjasama agensi kerajaan, pembekal ternakan dan juga orang awam yang terlibat secara langsung atau tidak langsung supaya aktiviti penyembelihan korban dapat dijalankan dengan lebih teratur, bersih dan mengambil kira kebajikan haiwan dan keselamatan makanan.

2. OBJEKTIF

Objektif garis panduan ini adalah untuk memberi kesedaran umat Islam untuk melakukan ibadah korban dengan melakukan penyembelihan ternakan korban mereka di rumah-rumah sembelih yang diluluskan dan berlesen.

Sekiranya, penyembelihan ternakan korban dilakukan di masjid, surau, padang awam, balai raya dan rumah persendirian, garis panduan ini bertujuan untuk memberi panduan tentang pengendalian dan penyembelihan ternakan korban.

3. UNDANG-UNDANG DAN PERATURAN

Pemindahan ternakan dan kawalan penyakit

- a) Pembekal dan pihak pengurusan ternakan korban perlu mendapatkan Sijil Kesihatan Veterinar dan Akuan Kebenaran Pindah dari Pusat Veterinar Kecil, Pejabat Veterinar Daerah dan Ibu pejabat Perkhidmatan Veterinar Negeri yang berkenaan dan juga capaian atas talian e-permit 2.
- b) Pihak Berkuasa Veterinar hendaklah memeriksa setiap ternakan korban sebelum Sijil Kesihatan Veterinar dan Akuan Kebenaran Pindah dikeluarkan bagi memastikan ternakan yang akan disembelih sihat dan bebas daripada penyakit.
- c) Sekiranya, ternakan tersebut akan disembelih di masjid, surau, padang awam, balai raya dan rumah persendirian, selain daripada Sijil Kesihatan Veterinar dan Akuan Kebenaran Pindah, Permit Penyembelihan Luar juga perlu dipohon oleh pihak pengurusan ternakan korban atau mana-mana individu yang akan menjalankan aktiviti korban. Permit Penyembelihan Luar boleh diperolehi dari Pusat Veterinar Kecil, Pejabat Veterinar Daerah, Ibu pejabat Perkhidmatan Veterinar Negeri yang berkenaan dan Rumah Sembelih Jabatan.
- d) Penyembelihan Luar bagi tujuan sembelihan korban hanya dibenarkan pada 10, 11, 12 dan 13 Zulhijjah sahaja.
- e) Pihak pengurusan ternakan korban atau mana-mana individu yang akan menjalankan aktiviti korban perlu memohon Permit Penyembelihan Luar sekurang-kurangnya dua (2) hari sebelum tarikh penyembelihan korban.

Kebersihan

- a) Penyembelihan ternakan korban yang dilakukan di Rumah Sembelih diluluskan atau berlesen adalah lebih terjamin kebersihan dan keselamatannya kerana setiap daging yang dikeluarkan telah diperiksa oleh Pihak Berkuasa Veterinar.
- b) Penyembelihan ternakan korban yang dilakukan di luar dan perkarangan masjid, surau, balai raya, padang awam, taman perumahan serta rumah persendirian perlu menitikberatkan aspek kebersihan dan kualiti bagi memastikan daging korban bersih dan selamat untuk dimakan.

Penguatkuasaan Undang-undang

Garis Panduan ini adalah tertakluk kepada undang-undang dan peraturan berikut:

- a) Akta Binatang 1953 (Semakan 2006)[Akta 647];
- b) Kaedah-kaedah Binatang (Kawalan Penyembelihan) 2009;
- c) Enakmen dan warta kerajaan negeri;
- d) Undang-Undang Kecil Pihak Berkuasa Tempatan.

4. KEBAJIKAN HAIWAN

Garis panduan ini memberi penekanan terhadap aspek-aspek kebajikan haiwan yang merangkumi:

Teknik-teknik mengikat dan merebah ternakan korban

- a) Ternakan korban perlu diikat menggunakan tali yang sesuai dan direbahkan di tempat yang sesuai serta tidak menyebabkan kecederaan kepada ternakan bagi memastikan kebajikan haiwan terjamin.
- b) Panduan mengenai teknik-teknik mengikat dan merebahkan ternakan sembelihan korban bagi menjamin kebajikan haiwan boleh berpanduan kepada gambar rajah di lampiran.

- c) Khidmat nasihat mengenai kebajikan haiwan, teknik-teknik mengikat dan merebahkan ternakan sembelihan korban boleh diperolehi daripada Pihak Berkuasa Veterinar di negeri-negeri berkenaan.

Penyembelihan korban

Garis Panduan ini memberi panduan tentang penyembelihan ternakan korban mengikut syariat Islam:

- a) Penyembelihan korban hendaklah mengikut hukum-hukum penyembelihan serta syarat yang telah ditetapkan oleh agama Islam.
- b) Ternakan korban yang sedang menunggu untuk disembelih perlu diasingkan bagi mengelakkan ia melihat ternakan lain yang sedang disembelih bagi menjaga kebajikan haiwan mengikut pandangan Islam.
- c) Pisau yang digunakan untuk penyembelihan hendaklah tajam dan bersih dan penyembelihan hendaklah dilakukan dengan pantas tanpa mengangkat mata pisau.
- d) Pisau tidak boleh diasah di hadapan ternakan yang hendak disembelih bagi menjaga kebajikan haiwan.
- e) Ternakan hendaklah dilapah ditempat yang bersih dan bersesuaian setelah ianya mati.

5. PENYEMBELIHAN TERNAKAN KORBAN

Penyembelihan ternakan korban yang dijalankan di masjid, surau, padang awam, balai raya dan rumah persendirian perlu mempunyai kemudahan- kemudahan yang bersesuaian seperti berikut :

Tempat simpanan ternakan korban

- a) Lapang, teduh dan selamat;
- b) Bekalan makanan dan air minuman yang bersih dan mencukupi.

Tapak penyembelihan ternakan korban

- a) Sesuai, bersih dan selamat;
- b) Penyembelihan tidak boleh dilakukan berhampiran saluran awam.

Operasi penyembelihan ternakan korban

- a) Teknik merebah ternakan sebelum disembelih
 - (i) Mengambil kira kebajikan ternakan;
 - (ii) Teknik-teknik merebah ternakan berdasarkan lampiran di dalam Garis Panduan ini;
 - (iii) Setelah ternakan direbahkan, pekerja perlu menekan badan lembu dengan serta-merta bagi mengelakkan lembu daripada bergerak dan terus mengikat kaki depan dan belakang.
- b) Proses penyembelihan
 - (i) Penyembelihan korban hendaklah mengikut hukum-hukum penyembelihan serta syarat yang telah ditetapkan oleh agama Islam;

- (ii) Ternakan korban diletakkan dalam posisi menghadap kiblat;
- (iii) Penyembelihan hendaklah dilakukan dengan menggunakan pisau yang tajam dan bersih;
- (iv) Penyembelihan hendaklah dilakukan dengan pantas tanpa mengangkat mata pisau.

Tempat Melapah

- a) Ternakan yang telah disembelih, hendaklah digantung di tempat yang bersesuaian dan bersih bagi tujuan melapah;
- b) Sekiranya, ternakan dilapah di atas lantai, permukaannya hendaklah dialas dengan pelapik yang sesuai dan bersih;
- c) Karkas yang telah dilapah, hendaklah digantung pada tiang yang tidak karat dengan ketinggian yang bersesuaian agar karkas tidak mencecah lantai;
- d) Daging hendaklah dimasukkan dalam bekas yang bersih.

5.1. Tempat memotong daging

- a) Pemotongan daging hendaklah menggunakan Papan Pemotong Daging (Chopping board) dari bahan yang sesuai, bersih, selamat dan kukuh (dicadangkan diperbuat daripada plastik sekurang-kurangnya 2 inci tebal);
- b) Proses memotong daging hendaklah dilakukan di atas meja yang di alas dengan bahan yang sesuai dan bersih.

6. PENGURUSAN SISA TERNAKAN KORBAN

Sisa penyembelihan ternakan korban hendaklah diuruskan dengan baik bagi mengelakkan pencemaran:

Sisa pepejal

- a) Sisa pepejal hendaklah dibungkus dan dilupuskan dengan cara yang bersesuaian dan tidak bertentangan dengan peraturan Pihak Berkuasa Tempatan.

Sisa cecair

- (a) Sisa cecair seperti darah penyembelihan hendaklah ditanam atau dilupuskan dengan cara yang bersesuaian serta tidak bertentangan dengan peraturan Pihak Berkuasa Tempatan.

7. KESEDARAN AWAM

Garis Panduan ini bertujuan untuk memberi kesedaran kepada semua yang terlibat dalam rantaian penyembelihan ternakan korban :

Orang awam

- a) Kesedaran terhadap risiko jangkitan penyakit zoonotik (penyakit yang berjangkit dari ternakan ke manusia);
- b) Memberi kesedaran kepada orang ramai untuk menyembelih ternakan korban mereka di rumah sembelih yang diluluskan atau berlesen bagi memastikan daging korban yang bersih dan selamat untuk dimakan. Ianya dapat dilakukan dengan

- kerjasama Jabatan Perkhidmatan Veterinar, Agensi-agensi Kerajaan, Pertubuhan Bukan Kerajaan, Ahli- ahli Jawatankuasa Masjid, Surau, serta Ketua-ketua Kampung/adat;
- c) Memberi kesedaran kepada orang awam tentang kepentingan mengutamakan aspek keselamatan dan kesihatan dalam setiap aktiviti penyembelihan ternakan korban tidak kira di mana ia dilakukan.

8. PEMANTAUAN OPERASI PENYEMBELIHAN KORBAN

Operasi pemantauan aktiviti penyembelihan korban akan dilakukan oleh :

Pihak Berkuasa Veterinar

- a) Akuan Kebenaran Pindah dan Sijil Kesihatan Veterinar (SKV);
- b) Post-mortem dan Ante-mortem;
- c) Permit Penyembelihan Luar;
- d) Kebajikan haiwan.

Pihak Berkuasa Agama

- a) Tatacara Penyembelihan mengikut syariat Islam.

Pihak Berkuasa Tempatan

- a) Kawalan kebersihan persekitaran.

9. RUJUKAN



Akta Binatang 1953 (Semakan 2006)[Akta 647];



- a) Pencegahan Perebakan Penyakit – Am;
- b) Pencegahan Kezaliman Terhadap Binatang;
- c) Perintah Di Bawah Subseksyen 36(1) dan (2) (Kawasan Kawalan Penyakit di peringkat Negeri).

Kaedah-Kaedah Pemeriksaan Daging 1985;

Kaedah-Kaedah Binatang (Kawalan Penyembelihan) 2009;

Enakmen Pendaftaran Lembu-Kerbau (Peringkat Negeri).

LAMPIRAN 1**Kekangan Kaedah Rope Squeeze**



**GARIS PANDUAN
PELAKSANAAN
IBADAH KORBAN**

GARIS PANDUAN PELAKSANAAN IBADAH QURBAN

10. BAHAGIAN 1: TATACARA PELAKSANAAN IBADAH QURBAN

Amalan qurban menjadi satu ibadah tahunan bagi masyarakat Islam khususnya di Malaysia yang melakukan penyembelihan qurban sama ada dilakukan di masjid, surau, balai raya, padang awam, taman perumahan atau rumah persendirian. Pelbagai cara dan kaedah dilakukan oleh masyarakat awam dalam melaksanakan penyembelihan qurban.

11. TAFSIRAN

Bagi maksud garis panduan ini:

- a) **“Qurban”** bermaksud nama bagi sesuatu yang diqurbankan, atau nama bagi ternakan yang disembelih pada *‘Idul Adha*. Qurban bermaksud menyembelih ternakan tertentu dengan taqarrub kepada Allah SWT pada masa-masa tertentu. Ia juga diertikan sebagai ternakan an’am yang disembelih pada Hari Nahar dengan tujuan taqarrub kepada Allah SWT.
- b) **“Taqarrub”** bermaksud perbuatan atau amalan yang dilakukan bertujuan untuk mendekatkan diri kepada Allah SWT. Ibadah qurban adalah salah satu amalan untuk mendekatkan diri kepada Allah SWT berdasarkan kepada surah al-Kauthar ayat 2, surah al-Hajj ayat 36.
- c) **“Nazar”** bermaksud janji kepada Allah SWT. Menurut al-Mawardi, nazar ialah iltizam (mewajibkan diri) untuk melakukan qurban (sesuatu yang boleh menghampirkan diri kepada Allah) yang pada asalnya tidak wajib di sisi syarak.
- d) **“Qurban Nazar”** bermaksud qurban yang diwajibkan ke atas individu yang berazam untuk melakukan qurban nazar. Contohnya, apabila seseorang menyebut: “Wajib ke atas diriku berqurban seekor kambing kerana Allah SWT”.

- e) **“Qurban Sunat (tatawu’)**” bermaksud qurban yang dilakukan bukan niat kerana bernazar. Ia dikira sunat kerana tidak ada sebab-sebab dan syarat yang menjadikannya wajib.
- f) **“Sunat Muakkadah”** bermaksud sunat yang amat dituntut untuk melakukan ibadah qurban, dan makruh meninggalkan bagi yang berkemampuan.
- g) **“Hari Nahar”** bermaksud ‘Idul Adha atau Hari Raya Qurban, iaitu pada 10 Zulhijjah.
- h) **“Hari Tasyrik”** bermaksud 11, 12 dan 13 Zulhijjah.

12. HIKMAH IBADAH QURBAN

Ibadah qurban disyariatkan sebagai tanda bersyukur terhadap Allah SWT atas segala nikmat-Nya yang berbagai-bagai dan juga atas kekalnya manusia dari tahun ke tahun. Ia juga bertujuan menjadi kifarot bagi pelakunya sama ada disebabkan kesilapan-kesilapan yang telah dilakukan, ataupun dengan sebab kecuaiannya dalam menunaikan kewajipan, di samping memberikan kelegaan kepada keluarga orang yang berqurban dan juga mereka yang lain.

13. HUKUM BERQURBAN

Dalil pensyariatan ibadah qurban adalah berasaskan kepada al-Quran merujuk kepada surah al-Kauthar ayat 2, surah al-Hajj ayat 36 dan surah al-Safat ayat 107. Manakala dalil pensyariatan berasaskan Sunnah ialah daripada hadith Aisyah yang diriwayatkan oleh al-Tirmizi dan Ibn Majah dan hadith Anas yang diriwayatkan oleh Muslim.

Menurut pandangan jumhur ulama, hukum melaksanakan ibadah qurban adalah sunat muakkadah bagi individu yang berkemampuan. Pandangan ulama mazhab Shafi‘i adalah sunat ‘ain bagi setiap orang sekali dalam seumur hidup. Menurut pandangan yang masyhur di kalangan ulama mazhab Maliki adalah makruh meninggalkannya bagi

mereka yang mampu. Manakala bagi mereka yang berniat untuk melakukan qurban nazar maka hukum melaksanakannya adalah wajib.

14. JENIS QURBAN

Qurban terbahagi kepada dua jenis, iaitu qurban nazar (wajib) dan qurban sunat.

15. STATUS HUKUM DAGING QURBAN

Hukum berkaitan daging qurban terbahagi kepada beberapa status seperti yang berikut:

- a) Haram memakan daging bagi orang yang melakukan qurban nazar (wajib) dan juga ahli keluarga di bawah tanggungannya walaupun sedikit sebagaimana juga haram memberikan daging qurban tersebut kepada orang bukan Islam.
- b) Hukum pemberian daging qurban sunat kepada orang bukan Islam adalah haram menurut pandangan ulama mazhab Shafi'i.
- c) Kulit, lemak, daging, susu, kaki, kepala dan bulu- bulunya haram dijual oleh orang melakukan ibadah qurban sama ada qurban wajib atau qurban sunat.
- d) Bahagian atau anggota sembelihan qurban tidak harus dikhususkan kepada tukang sembelih sebagai upah melakukan sembelihan, kecuali bahagian atau anggota tersebut diberikan oleh individu yang melakukan qurban.
- e) Sunat bagi individu yang melakukan qurban sunat (*tatawu'*) memakan daging qurbannya.

16. PEMBAHAGIAN DAGING QURBAN

Pembahagian daging qurban terbahagi kepada dua jenis, iaitu sembelihan qurban wajib (nazar) dan sembelihan sunat seperti yang berikut:

- a) Pembahagian daging qurban wajib atau nazar:

Wajib semua dagingnya termasuk kulit dan tanduk disedekahkan kepada orang fakir dan miskin, dan haram bagi pihak orang yang berqurban memakan daging qurbannya atau memanfaatkan sembelihan itu untuk kepentingan dirinya.

b) Pembahagian daging qurban sunat:

Menurut pandangan ulama mazhab Shafi'i:

- (i) 1/3 untuk dimakan oleh pihak yang berqurban dan ahli keluarganya;
- (ii) 1/3 untuk disedekahkan kepada fakir dan miskin;
- (iii) 1/3 untuk dihadiahkan kepada sahabat handai termasuk orang kaya atau jiran-jiran.

Yang paling afdal menurut pandangan ulama mazhab Shafi ialah bersedekah semuanya kecuali pada beberapa ketul atau suapan yang agak berpatutan dimakan oleh orang yang berqurban untuk mengambil berkat, seperti sebahagian hati kerana ianya sunat dimakan. Amalan ini pernah dilakukan oleh Nabi SAW ketika Baginda melakukan qurban.

17. INDIVIDU YANG DITUNTUT MELAKUKAN IBADAH QURBAN

Syarat-syarat bagi individu yang dituntut melakukan ibadah qurban adalah seperti yang berikut:

- a) Seorang Islam yang masih hidup. Tidak boleh melakukan untuk si mati jika dia tidak meninggalkan wasiat.
- b) Seorang yang merdeka. Tidak dituntut ke atas hamba.
- c) Mencapai umur baligh dan berakal.
- d) Bermukim, iaitu menetap di sesuatu kawasan.
- e) Mampu melaksanakan, iaitu mereka yang mempunyai wang untuk berbelanja mendapatkan ternakan qurban, yang lebih daripada keperluannya dan keperluan mereka yang berada di

bawah tanggungannya untuk Hari Raya dan Hari-hari Tasyrik kerana tempoh itulah masa bagi melakukan qurban.

18. SYARAT SAH BERQURBAN

Syarat sah berqurban hendaklah melakukan dua perkara:

- a) Niat untuk taqarrub diri kepada Allah SWT. Waktu niat qurban adalah semasa menyembelih atau semasa membeli ternakan qurban.
- b) Memilih ternakan qurban yang boleh dikongsi bahagian seperti unta, lembu dan kerbau jika ingin berkongsi tujuh orang. Manakala kambing atau biri- biri dikhususkan untuk seorang yang mewakili satu bahagian.

19. TEMPOH DAN MASA BERQURBAN

Tempoh dan masa berqurban hendaklah dilakukan berdasarkan ketetapan yang berikut, iaitu:

- a) Penyembelihan hendaklah dilakukan pada Hari Nahar (10 Zulhijjah) dan Hari Tasyrik (11 hingga 13 Zulhijjah) meliputi malam ke-11, 12 dan 13. Qurban tidak sah dilakukan pada malam sebelum Hari Raya (10 Zulhijjah). Ia juga tidak sah dilakukan pada malam 14 Zulhijjah.
- b) Penyembelihan dilakukan apabila berlalu masa dua rakaat solat sunat Hari Raya Adha serta bacaan khutbah. Sebagai contoh: Masa yang ditetapkan untuk solat sunat Hari Raya pada jam 8.30 pagi dan selesai pada jam 9.30 pagi. Maka waktu berqurban bermula pada jam 9.30 pagi.
- c) Penyembelihan yang dilakukan selepas tempoh tersebut, sama ada imam menunaikan solat atau tidak, sama ada orang berqurban menunaikan solat atau tidak, sama ada imam menyembelih haiwan qurban atau tidak, hukumnya adalah sah.

- d) Waktu penyembelihan qurban berterusan siang dan malam (tetapi makruh dilakukan pada waktu malam) sehingga Hari Tasyrik yang terakhir (13 Zulhijjah) sebelum terbenamnya matahari. Bagi penyembelihan qurban yang dilakukan sebelum terbit fajar, maka hukumnya adalah tidak sah.
- e) Penyembelihan qurban yang dilakukan selepas terbit matahari dan sebelum waktu solat sunat Hari Raya Adha adalah tidak mendapat pahala sunat dan tidak dikira sebagai ibadah.

20. SYARAT SAH HAIWAN TERNAKAN UNTUK QURBAN

Untuk memenuhi syarat-syarat sah sesuatu ibadah qurban, perkara-perkara berikut disyaratkan ke atas haiwan ternakan berkenaan, iaitu:

- a) Ibadah qurban tidak sah kecuali dengan haiwan ternakan sahaja, iaitu unta, lembu, kambing, biri-biri dan semua yang termasuk dalam jenisnya, sama ada jantan atau betina, yang menjadi baka ataupun dikasi. Dengan itu, tidak sah berqurban selain dengan haiwan ternakan seperti kerbau liar, kijang, rusa, pelanduk dan seumpamanya.
- b) Haiwan ternakan itu hendaklah sihat dan bebas daripada sebarang penyakit.
- c) Haiwan ternakan itu tidak mempunyai kecacatan, sama ada tempang, buta, telinga koyak, patah sebelah tanduk, cedera pada tubuh badan, kurus sehingga tidak mempunyai lemak, atau kecacatan yang lain sepertinya.
- d) Haiwan ternakan itu telah mencapai satu tahap minimum umur, iaitu:
 - (i) unta : berumur lima tahun masuk tahun keenam;
 - (ii) lembu/kerbau : berumur dua tahun masuk tahun ketiga;
 - (iii) kambing : berumur dua tahun masuk tahun ketiga;
 - (iv) biri-biri : berumur satu tahun masuk tahun kedua, ataupun telah bersalin gigi hadapan.

21. SYARAT PENYEMBELIH HAIWAN QURBAN

Afdal bagi orang yang melakukan qurban menyembelih sendiri qurbannya. Walau bagaimanapun, dia boleh mewakilkan kepada orang lain atau syarikat atau persatuan yang bersetuju untuk menguruskan ibadah qurban, dan sunat baginya sama-sama hadir menyaksikannya dengan syarat-syarat seperti yang berikut:

- a) Penyembelih qurban hendaklah seorang muslim, sama ada lelaki atau perempuan. Namun yang afdal menyembelih qurban adalah orang lelaki dan sunat orang perempuan mewakilkan kepada orang lelaki;
- b) Seorang yang telah *mumayyiz* dan berakal;
- c) Mampu melakukannya (pandai menyembelih) dan dilakukan tanpa ada paksaan;
- d) Sembelihan makruh jika mewakilkan qurban itu untuk disembelih oleh ahli kitab, atau kepada kanak-kanak dan perempuan haid;
- e) Jika qurban itu disembelih oleh orang kafir yang diwakilkan oleh tuan qurban, maka qurban itu tidak sah.

22. SYARAT SAH SEMBELIHAN

Syarat sah sembelihan adalah dengan memutuskan:

- a) dua urat pembuluh darah, iaitu karotid dan jugular (wadajain);
- b) urat mari' (saluran makanan); dan
- c) halqum (saluran pernafasan).

23. SYARAT ALAT MENYEMBELIH

Alat menyembelih hendaklah tajam, bukan menggunakan alat yang tumpul, tulang dan gigi haiwan.

24. PERKARA SUNAT KETIKA BERQURBAN

Antara perkara sunat ketika berqurban adalah seperti yang berikut:

- a) Menambat ternakan qurban menjelang Hari *Nahar*.
- b) Memberi makanan kepada haiwan qurban sebelum disembelih.
- c) Memastikan haiwan tersebut tidak makan makanan yang syubhah seperti makan rumput di kawasan yang bukan milik tuan haiwan qurban.
- d) Meletakkan tanda serta menutup tubuh haiwan qurban supaya dapat merasakan kepentingan qurban.
- e) Melakukan penyembelihan qurban dengan sendiri.
- f) Membaca Bismillah (بِسْمِ اللَّهِ).
- g) Berselawat ke atas Nabi SAW.
- h) Penyembelih dan haiwan mengadap ke arah qiblat.
- i) Memilih haiwan ternakan yang paling baik.
- j) Menunggu haiwan yang disembelih itu sehingga sejuk dan semua anggotanya tidak bergerak lagi atau benar-benar mati dan baharulah dilapah.
- k) Orang yang melakukan qurban disunatkan tidak bercukur dan tidak memotong kukunya setelah tiba bulan Zulhijjah sehingga dia telah selesai berqurban.

25. PERKARA MAKRUH KETIKA BERQURBAN

Antara perkara yang makruh ketika berqurban adalah seperti yang berikut:

- a) Melakukan qurban ke atas haiwan yang carik telinganya atau terpotong sedikit di belakang telinganya.
- b) Memotong bulu haiwan yang hendak diqurbankan bagi tujuan kegunaan sendiri jika boleh memudaratkannya.
- c) Melakukan qurban ke atas haiwan yang pecah atau patah tanduknya, atau tiada bertanduk.

- d) Memerah susu haiwan yang hendak dijadikan qurban dan meminumnya kecuali disedekahkan susu tersebut.
- e) Memotong kuku dan bercukur bagi orang yang berniat qurban.
- f) Melakukan sembelihan qurban pada waktu malam.

26. CARA MENYEMBELIH HAIWAN QURBAN

Cara menyembelih ternakan qurban adalah seperti yang berikut:

- a) Niat atau qasad untuk sembelih qurban; antara contoh- contoh lafaz niat:
 - (i) Qurban Sunat

Kategori Haiwan Ternakan Qurban	Contoh Lafaz Niat Oleh Penyembelih Qurban
Seekor binatang yang tidak berkongsi (kambing, lembu, kerbau)	Bagi penyembelih yang berqurban: <i>"Inilah qurbanku kerana Allah".</i> <u>Bagi penyembelih yang tidak menyertai qurban:</u> <i>"Inilah qurban Ali dan aku mewakilinya kerana Allah".</i>
Seekor binatang yang berkongsi tujuh bahagian.	<u>Bagi penyembelih yang menyertai qurban:</u> <i>"Inilah qurban aku dan aku mewakili Ali, Abu, Ahmad, Aishah, Adibah dan Aminah kerana Allah".</i> <u>Bagi penyembelih yang tidak menyertai qurban:</u> <i>"Inilah qurban Hasan, Ali, Abu, Ahmad, Aishah, Adibah dan Aminah dan aku mewakili mereka kerana Allah".</i>

(ii) Qurban Nazar

Kategori Haiwan Ternakan Qurban	Contoh Lafaz Niat Oleh Penyembelih Qurban
Seekor binatang yang tidak berkongsi (kambing, lembu, kerbau)	<u>Bagi penyembelih yang berqurban:</u> <i>"Inilah qurban wajib ke atasku kerana Allah".</i> <u>Bagi penyembelih yang tidak menyertai qurban:</u> <i>"Inilah qurban wajib ke atas Ali dan aku mewakilinya kerana Allah".</i>
Seekor binatang yang berkongsi tujuh bahagian.	<u>Bagi penyembelih yang menyertai qurban:</u> <i>"Inilah qurban wajib ke atasku dan ke atas Ali, Abu, Ahmad, Aishah, Adibah dan Aminah dan aku mewakili mereka kerana Allah".</i> <u>Bagi penyembelih yang tidak menyertai qurban:</u> <i>"Inilah qurban wajib ke atas Hasan, Ali, Abu, Ahmad, Aishah, Adibah dan Aminah dan aku mewakili mereka kerana Allah".</i>

- b) Membaringkan dan menghadapkan rusuk kiri haiwan ke arah kiblat dan kepalanya diangkat sedikit;
- c) Direbahkan dengan menggunakan tali yang sesuai, tempat yang sesuai dan tidak menyebabkan kecederaan kepada ternakan;
- d) Membaca **بِسْمِ اللَّهِ** atau **بِسْمِ اللَّهِ وَاللَّهُ أَكْبَرُ**

- e) Berselawat ke atas Nabi SAW;
- f) Bertakbir tiga kali sebelum dan selepas بِسْمِ اللَّهِ sebagai contoh:

اَللّٰهُ اَكْبَرُ اَللّٰهُ اَكْبَرُ اَللّٰهُ اَكْبَرُ بِسْمِ اللّٰهِ اَللّٰهُ اَكْبَرُ اَللّٰهُ اَكْبَرُ

- g) Penyembelih hendaklah memegang kulit tengkuk haiwan di bahagian bawah dagunya dan menariknya sehingga nampak jelas kulitnya;
- h) Meletakkan alat menyembelih di leher dengan memutuskan halqum, urat mari' dan dua urat di leher kiri kanan haiwan (*wadajain*);
- i) Penyembelihan hendaklah dilakukan dengan kadar segera dan tidak diselangi dengan amalan-amalan lain; dan
- j) Berdoa kepada Allah SWT agar ibadah qurban diterima:

اللَّهُمَّ إِنَّ هَذَا مِنْكَ وَإِلَيْكَ فَتَقَبَّلْ مِنِّي

27. AGIHAN DAGING QURBAN

Sebelum melaksanakan pengagihan daging qurban, tindakan pertama yang wajib dilakukan ialah mengasingkan antara daging bahagian qurban wajib daripada daging bahagian qurban sunat sebelum diagihkan kepada penerima. Hal ini jika perkongsian tujuh bahagian itu berlaku antara mereka yang berniat qurban wajib dengan mereka yang berniat qurban sunat, atau ada bahagian yang diniatkan untuk aqiqah. Ini langkah pertama yang amat penting kerana daging qurban wajib, wajib diagihkan kepada yang berhak kesemuanya, begitu juga dengan bahagian aqiqah yang ada cara pengagihannya yang sedikit berbeza dengan pengagihan qurban sunat.

Beberapa urusan lain yang berkaitan dengannya hendaklah diputuskan melalui jawatankuasa yang dibentuk untuk memudahkan pengagihan kepada pihak-pihak yang telah dikenal pasti seperti yang berikut:

- a) Memastikan daging qurban cukup untuk diagihkan
- b) kepada pihak-pihak yang telah disenaraikan;
- c) Menyediakan senarai penerima daging qurban mengikut keutamaan;
- d) Mengutamakan golongan fakir dan miskin yang telah dikenal pasti status mereka;
- e) Mengagihkan daging qurban kepada mereka yang tinggal di kawasan terpencil;
- f) Menyediakan kontena sejuk (jika perlu) untuk menempatkan daging qurban sebelum ia diagih ke kawasan pedalaman; dan
- g) Mengagihkan daging qurban kepada golongan yang berada sekiranya terdapat lebihan daging qurban tersebut.

28. BAHAGIAN 2: PENGURUSAN QURBAN

29. TAFSIRAN

Bagi maksud garis panduan ini:

- a) **“Akad Wakalah”** bermaksud suatu akad untuk mewakilkan orang lain (wakil) melaksanakan urusan dalam mengendalikan perkara yang diharuskan oleh syarak.
- b) **“Muwakkil (pewakil)”** bermaksud orang yang menyuruh orang lain menjadi wakil atau orang yang membuat wakalah.
- c) **“Wakil”** bermaksud orang yang menerima wakalah.
- d) **“Muwakkal fih”** bermaksud barang atau urusan yang hendak diserahkan kepada wakil.
- e) **“Tawkil”** bermaksud pelantikan wakil.
- f) **“Hibah”** bermaksud pemberian yang mencakupi hadiah dan sedekah atau sumbangan. Dalam istilah syarak ialah akad yang dapat memindah milik sesuatu tanpa balasan.
- g) **“Qurban Nazar”** bermaksud qurban yang diwajibkan ke atas individu yang berazam untuk melakukan qurban nazar. Contohnya apabila seseorang menyebut: “Wajib ke atas diriku berqurban seekor kambing kerana Allah SWT”.

30. PIHAK WAKIL MELANTIK WAKIL LAIN (TAWKIL) MELAKSANAKAN QURBAN

Kaedah umum menyatakan bahawa wakil tidak harus mewakilkan orang lain terhadap apa yang diwakilinya tanpa izin pewakil. Tetapi sekiranya pewakil (orang yang berniat qurban) mengungkap dengan lafaz umum, maka harus bagi wakil untuk mewakilkan kepada orang lain berdasarkan kepada kefahaman umum. Contoh akad wakalah umum:

“Saya Ahmad bin Muhamad bersetuju mewakilkan tuan menguruskan qurban saya pada tahun ini (1434H) kerana Allah Ta’ala”.

Sekiranya pewakil tidak menyebut lafaz yang menunjukkan umum keizinannya untuk bertindak, maka tidak harus bagi wakil mewakilkan (*tawkil*) kepada orang lain untuk menerima kerana wakil bertindak mengikut penyerahan pewakil dan memiliki kadar serahan itu sahaja.

Wakil juga tidak harus mewakilkan (*tawkil*) kepada orang lain tanpa izin pewakil apabila ia mampu melakukannya. Apabila tidak mampu melaksanakan apa yang diwakilkan kepadanya, harus baginya tawkil.

31. LAFAZ NIAT WAKALAH UNTUK PELAKSANAAN QURBAN

Contoh lafaz khusus, akad orang yang berqurban menyuruh seseorang mewakilinya:

- a) *“Saya Ahmad bin Muhamad bersetuju mewakilkan Pengarah Program Syarikat Qurban melaksanakan qurban saya untuk tahun ini (1434H) dengan bayaran RM500.00 bagi satu bahagian beserta upah RM100.00 kerana Allah Ta’ala.”*
- b) *“Saya Ahmad bin Muhamad bersetuju mewakilkan Pengarah Program Syarikat Qurban melaksanakan qurban saya, isteri saya Fatimah, anak saya Aishah dan Aminah untuk tahun ini (1434H) dengan bayaran RM2000.00 bagi empat bahagian beserta upah RM400.00 kerana Allah Ta’ala.”*

32. PERKARA YANG MESTI DIKETAHUI SEBELUM MEWAKILKAN URUSAN QURBAN

Perkara-perkara yang mesti diketahui oleh individu sebelum mewakili urusan qurban kepada persatuan, agensi atau syarikat adalah seperti yang berikut:

- a) hendaklah mengetahui kadar harga bagi satu bahagian qurban yang ditawarkan oleh persatuan, agensi atau syarikat;
- b) hendaklah mengetahui kadar upah yang diambil oleh persatuan, agensi atau syarikat;
- c) hendaklah mengagihkan daging qurban mengikut hukum syarak;
- d) hendaklah mengetahui orang yang akan menjadi wakil untuk menyembelih haiwan qurban.

33. PENGURUSAN QURBAN OLEH PERSATUAN, AGENSI ATAU SYARIKAT DALAM NEGARA

Pihak persatuan, agensi atau syarikat hendaklah menjelaskan perkara-perkara berikut:

- a) urusan jual beli seperti akad, jenis haiwan qurban dan fizikal haiwan yang cukup syarat;
- b) kadar harga bagi satu bahagian qurban yang ditawarkan;
- c) kadar kos pengurusan (upah) yang diambil;
- d) cara pengagihan dan penerima daging qurban.

34. PENGURUSAN QURBAN OLEH PERSATUAN, AGENSI ATAU SYARIKAT LUAR NEGARA

Pihak persatuan, agensi atau syarikat luar Negara hendaklah menjelaskan perkara-perkara berikut:

- a) urusan jual beli seperti akad, jenis haiwan qurban dan fizikal haiwan yang cukup syarat;

- b) kadar harga bagi satu bahagian qurban yang ditawarkan oleh syarikat atau persatuan;
- c) menetapkan kadar kos pengurusan semasa di awal akad bukan selepas akad;
- d) menetapkan kos pengurusan yang terlibat di luar negara selepas akad adalah ditanggung oleh persatuan, agensi atau syarikat dan bukan pihak individu.

35. PENYERAHAN WANG KEPADA WAKIL BAGI QURBAN DI LUAR NEGARA

Apa-apa jumlah wang yang diberi kepada pihak pengurusan qurban yang dilantik sebagai wakil untuk menguruskan qurban di luar negara adalah terlaksana selagi mana wang berkenaan dibelanja mengikut akad yang telah dipersetujui. Akad tersebut hendaklah:

- a) akad penyerahan dengan lafaz yang khusus, bukan lafaz am kerana lafaz am mengandungi ketidakjelasan (*gharar*);
- b) menjelaskan tentang jenis, sifat dan kadar harganya;
- c) orang yang menjadi wakil, tidak boleh mewakili kepada orang lain, kecuali mendapat izin daripada pewakil (*muwakkil*) atau wakil tidak mampu melaksanakannya.

36. QURBAN YANG BERCAMPUR DENGAN AQIQAH, HADIAH, NAZAR DAN SEMBELIHAN BIASA

Sekiranya berlaku percampuran qurban dan perkara-perkara lain, maka:

- a) wajib dilakukan pengasingan antara daging bahagian qurban wajib (nazar) daripada daging bahagian qurban sunat, aqiqah, hadiah atau daging sembelihan untuk dijual, sebelum diagihkan kepada penerima jika terjadi perkongsian sedemikian. Langkah ini amat penting kerana daging qurban

wajib (nazar), hendaklah diagihkan kesemuanya kepada yang berhak;

- b) adalah lebih baik, pihak yang menguruskan qurban tidak mencampurkan antara urusan qurban wajib (nazar) dengan qurban sunat, aqiqah, hadiah atau daging sembelihan biasa.

37. PEMBERIAN HAIWAN QURBAN OLEH ORANG PERSEORANGAN, PERSATUAN, ATAU AGENSI

Pemberian atau sumbangan haiwan ternakan oleh orang perseorangan, persatuan, agensi, syarikat, jabatan atau kementerian kepada masyarakat Islam bagi tujuan qurban hendaklah diserahkan kepada jawatankuasa masjid atau surau untuk diuruskan oleh jawatankuasa yang dilantik.

Sesuatu pemberian atau sumbangan hendaklah dijelaskan akadnya terlebih dahulu sebelum menerima penyerahan, iaitu sama ada akad pemberian (hibah) sebagai hak milik atau akad wakalah untuk melantik satu pihak sebagai wakil menguruskan haiwan untuk qurban.

a) Akad Pemberian atau Hibah Sebagai Hak milik Ke Atas Haiwan Qurban

- (i) Contoh lafaz hibah:

“Saya Ahmad bin Muhamad bersetuju menyerahkan sumbangan 30 ekor lembu qurban untuk tahun 1434H kepada jawatankuasa masjid/ surau untuk diuruskan”.

“Saya mewakili Kementerian yang bersetuju menyerahkan sumbangan 30 ekor lembu qurban untuk tahun 1434H kepada jawatankuasa masjid/ surau untuk diuruskan”.

- (ii) Pihak jawatankuasa masjid/sarau boleh memilih dan memberi keutamaan kepada golongan asnaf fakir miskin atau individu lain bagi mewakili bahagian qurban yang disertai.

- (iii) Asnaf fakir miskin atau individu yang terpilih disunatkan mengambil daging tidak melebihi 1/3 daripada bahagian qurban yang disertai.
- (iv) Pihak jawatankuasa masjid/surau dilarang melakukan perkara lain ke atas haiwan qurban kecuali untuk ibadah qurban sahaja.

b) Akad Wakalah Sebagai Wakil Menguruskan Haiwan Ternakan Untuk Qurban

- (i) Pihak jawatankuasa masjid/surau hendaklah mengikut akad yang diamanahkan sebagai wakil mengurus haiwan ternakan untuk qurban sama ada dengan lafaz am atau lafaz khas.

- (ii) Contoh lafaz am:

“Saya Ahmad bin Muhamad bersetuju melantik jawatankuasa masjid/surau sebagai wakil untuk menguruskan 10 ekor lembu sebagai sumbangan 70 bahagian qurban kepada penduduk kampung ini”.

- (iii) Contoh lafaz khas:

“Saya mewakili Syarikat yang bersetuju melantik jawatankuasa masjid/surau sebagai wakil untuk menguruskan 10 ekor lembu sebagai sumbangan 70 bahagian qurban kepada fakir miskin di kampung ini”.

- (iv) Sekiranya perlu, pihak jawatankuasa masjid/surau boleh mengenakan kos pengurusan dengan kadar yang berpatutan kepada peserta ibadah qurban yang terpilih.

- (v) Asnaf fakir miskin atau individu yang terpilih disunatkan mengambil daging qurban tidak melebihi 1/3 daripada bahagian qurban yang disertai.

38. PEMBERIAN HAIWAN QURBAN OLEH ORANG BUKAN ISLAM

Pemberian, hibah atau sumbangan haiwan qurban oleh orang perseorangan, persatuan atau pertubuhan bukan Islam kepada masyarakat Islam bagi tujuan qurban hendaklah diuruskan seperti yang berikut:

- a) Haiwan qurban tersebut hendaklah diserahkan kepada jawatankuasa masjid/surau untuk diuruskan.
- b) Pihak jawatankuasa yang dilantik perlu memilih asnaf fakir miskin atau individu bagi mewakili bahagian qurban yang disertai.
- c) Asnaf fakir miskin atau individu yang terpilih disunatkan mengambil daging qurban tidak melebihi 1/3 daripada bahagian qurban yang disertai.
- d) Sekiranya perlu, pihak jawatankuasa masjid/surau boleh mengenakan kos pengurusan dengan kadar yang berpatutan kepada peserta ibadah qurban yang terpilih.

39. PENUTUP

Garis panduan ini diharap dapat membantu orang yang berhajat melakukan ibadah qurban sebagai persediaan awal sebelum melakukannya, termasuk mendapat gambaran yang lebih jelas berkenaan cara melakukan ibadah qurban di samping menjaga adab-adab yang ditetapkan. Organisasi yang menguruskan qurban bagi pihak orang lain pula sewajarnya bersikap amanah dan tidak mengutamakan keuntungan semata-mata. Ini kerana perbuatan menolong untuk menyampaikan hajat seseorang juga diberi ganjaran oleh Allah SWT.

Justeru, garis panduan ini diharap dapat mencapai objektif qurban sebagai satu ibadah yang disyariatkan oleh Allah SWT. Semoga amalan penyembelihan ibadah qurban yang dilakukan memberi kesan yang mendalam serta galakan kepada orang lain untuk berusaha melaksanakan qurban sebagai salah satu tuntutan dalam Islam.

**GARIS PANDUAN
MENGENAI
PENGELUARAN,
PENYEDIAAN,
PENGENDALIAN
DAN PENYIMPANAN
MAKANAN HALAL**

GARIS PANDUAN MENGENAI PENGELUARAN, PENYEDIAAN, PENGENDALIAN DAN PENYIMPANAN MAKANAN HALAL

40. KEPUTUSAN:

Muzakarah Jawatankuasa Fatwa Majlis Kebangsaan Bagi Hal Ehwal Agama Islam Malaysia Kali Ke-48 yang bersidang pada 3 April 2000 telah membincangkan Garis Panduan Mengenai Pengeluaran, Penyediaan, Pengendalian Dan Penyimpanan Makanan Halal. Muzakarah telah memutuskan bahawa:

- a) Pengendali pisau mekanikal hendaklah seorang Muslim. Pengendali tersebut hendaklah membaca "Bismillah" sebelum memetik suis pisau mekanikal dan hendaklah memerhati kepada binatang yang disembelih.
- b) Penyembelih Muslim yang memetik suis pisau mekanikal tidak boleh meninggalkan tempat sembelihan semasa penyembelihan sedang dijalankan dan tidak boleh membuat kerja-kerja lain yang mengganggu tumpuan.

**GARIS PANDUAN
BERSAMA
KAWALAN UBAT-UBAT
DALAM ISLAM**

GARIS PANDUAN BERSAMA KAWALAN UBAT-UBAT DALAM ISLAM

41. PENDAHULUAN

Islam sangat mementingkan kebaikan dan kesihatan. Dalam aspek kesihatan orang-orang Islam disuruh supaya menjaga tubuh badan agar sentiasa berada dalam keadaan sihat, di samping itu Islam menyuruh umatnya berikhtiar mengubat apabila dijangkiti sesuatu penyakit. Terdapat banyak ayat al-Quran dan hadis yang berkaitan dengan penjagaan kesihatan dan mengubati penyakit.

Antaranya seperti berikut:

- a) Surah AI-Isra' ayat 82 - bermaksud:

“Dan Kami turunkan dengan beransur-ansur dari al-Quran, ayat-ayat suci yang menjadi ubat, penawar dan rahmat bagi orang yang beriman kepada-Nya.”

- b) Hadis Rasulullah S.A.W dari Jabir R.A.:

Katanya sabda Rasulullah S.A.W bermaksud: *“Bagi Setiap penyakit ada ubatnya, maka apabila ubat itu sesuai untuk sesuatu penyakit, akan sembuh dengan izin Allah.”*

Hadis Riwayat Muslim dan Ahmad.

- c) Hadis Rasulullah S.A.W lagi daripada Usamah bin Syarik katanya;

Seorang Arab Badawi bertanya Rasulullah S.A.W (apabila beliau dihinggapi penyakit), *“wahai Rasulullah S.A.W adakah perlu kami berubat?, kata Rasulullah, “Ya, Wahai hamba Allah hendaklah kamu berubat; maka sesungguhnya Allah tidak menjadikan sesuatu penyakit melainkan ada penawarnya”*

Hadis Riwayat At-Tirmizi (H. Hassan, Sahih)

Dalam konteks pengubatan, orang-orang Islam harus memahami prinsip-prinsip berikut iaitu:

- a) Kuasa penyembuh bagi sesuatu penyakit itu adalah kekuasaan Allah.
- b) Manusia hanya dikehendaki berikhtiar dalam mengubati sesuatu penyakit.
- c) Cara-cara dalam mengubati sesuatu penyakit itu mesti tidak bertentangan dengan prinsip-prinsip yang ditetapkan oleh Islam. Seperti penggunaan ilmu hitam, atau lain cara yang ditegah oleh Allah.
- d) Bahan-bahan ubatan yang digunakan mestilah sesuai dengan Islam. Seperti suci dan tidak dari najis/bernajis. Kecuali dalam keadaan terpaksa.
- e) Menjaga diri dari terkena penyakit lebih baik dari mengubat. *'Prevention is better than cure'*.

42. DEFINASI HUKUM SYARAK DAN UBAT YANG HALAL

Hukum Syarak

Hukum syarak ertinya undang-undang (hukum) Ubat yang Islam yang bersumberkan Al-Quran, Hadis, Halal Ijma dan Qiyas dengan berpandukan Mazhab Syafei atau undang-undang dalam mana-mana satu Mazhab Hanafi, Maliki atau Hambali yang telah diterima pakai oleh negara-negara di mana Buku Garis Panduan ini digunakan. Mana-mana sahaja bahan ubat-ubatan yang ada disebut menurut salah satu sumber di atas samada ia Halal atau Haram, maka ia menjadi hukum syarak atau undang-undang Islam.

43. DEFINISI UBAT

- a) Ubat adalah bahan yang digunakan untuk perubatan bagi mengesan (*diagnosis*), meringankan, merawat, menyembuh atau mencegah penyakit pada manusia serta meningkatkan taraf kesihatannya.
- b) Ubat boleh digunakan dengan berbagai cara dan bentuk. Ubat bukan saja boleh dimakan atau diminum seperti lazimnya, tetapi boleh digunakan dengan berbagai cara seperti melalui dubur (*supositori*), faraj (*pesari*), suntikan, ditanam di bawah kulit, disapu/dioleskan dan sebagainya.
- c) Pada umumnya semua ubat mempunyai risiko apabila digunakan. Namun begitu mengikut penilaian saintis risikonya adalah dianggap sedikit berbanding dengan manfaat yang dapat diperolehi dari segi kesihatan. Salah guna ubat timbul apabila ubat tersebut digunakan untuk tujuan selain daripada tujuan perubatan yang dinyatakan di atas dan menyebabkan risiko ubat menjadi lebih tinggi daripada kesan kebaikannya.

44. DEFINISI UBAT YANG HALAL

Ubat-ubatan yang halal (atau perkataan yang semakna dengannya) bukan sahaja mesti menepati definisi ubat seperti yang telah diterangkan tetapi sebagai tambahan mesti menepati ciri-ciri berikut:

- a) Bukanlah terdiri dari atau mengandungi bahan dari haiwan yang orang Islam dilarang oleh hukum syarak menggunakannya atau memakannya ataupun tidak disembelih mengikut hukum syarak.
- b) Tidaklah mengandungi bahan yang dihukum sebagai najis mengikut hukum syarak.
- c) Tidak disedia, diproses, dikilang atau di simpan dengan menggunakan apa-apa alat yang tidak bebas dari bahan-bahan najis mengikut hukum syarak.
- d) Tidaklah, apabila menyedia, memproses, mengilang atau menyimpannya itu, bersentuhan atau berdekatan dengan apa-apa bahan yang tidak memenuhi kehendak-kehendak perenggan (a), (b) atau (c) ataupun apa-apa bahan yang dihukum sebagai najis mengikut hukum syarak.
- e) Tidaklah, apabila digunakan dengan sengaja, boleh mendatangkan kesan-kesan yang boleh membahayakan.

Definisi ini boleh diperluaskan kepada mana-mana definisi yang difikirkan perlu dan sesuai dengan kepentingan negara masing-masing.

45. SUMBER UBAT

- i. Pada umumnya sumber ubat boleh dibahagikan kepada beberapa kelompok, iaitu sumber manusia, sumber haiwan, sumber tumbuhan, sumber tanah dan air. Sumber-sumber ini sering digunakan untuk menghasilkan bahan-bahan yang boleh dimanfaatkan sebagai ubat. Namun begitu melalui teknologi

moden pada masa ini, kebanyakan ubat menggunakan bahan sintatik.

- ii. Pada dasarnya untuk sesuatu ubat itu dikelaskan sebagai ubat yang halal, bukan sahaja sumber-sumber yang digunakan sebagai bahan ubat mestilah halal seperti yang diterangkan di bawah, malah bahan-bahan itu sendiri mesti suci dari najis mengikut hukum syarak serta digunakan untuk tujuan perubatan yang sah.

a) Sumber Manusia

Sumber ubat dari manusia adalah haram digunakan, kecuali dalam keadaan perlu dan tidak ada pilihan. Bahan-bahan ubat yang terbit dari sumber manusia selalunya melibatkan zat-zat tertentu seperti hormon, serum, imunoglobulin dan sebagainya yang diambil dari tubuh manusia.

b) Sumber Haiwan Darat dan Air

- (i) Semua haiwan darat dan air yang halal dimakan dapat dijadikan bahan ubat.
- (ii) Sumber ubat dari haiwan darat dan air yang haram dimakan adalah najis kecuali dalam keadaan perlu dan tidak ada pilihan.

c) Sumber Tumbuh-Tumbuhan Dan Mikro-organisma

Sumber tumbuh-tumbuhan dan mikro-organisma di darat dan di air, hasilnya adalah halal digunakan, kecuali yang beracun dan berbahaya.

d) Sumber Tanah Dan Air

Semua sumber tanah dan air dan hasilnya (termasuk bahan-bahan galian) adalah halal digunakan kecuali yang beracun dan berbahaya.

e) Sumber Sintatik

(i) Terbitan Sintatik

Bahan ubat yang dihasilkan cara sintatik adalah halal kecuali yang beracun, berbahaya dan bercampur dengan balian-bahan yang najis.

f) Sumber Eksipien

- (i) Eksipien adalah bahan tambahan yang diguna untuk memproses sesuatu bentuk/jenis ubat, contohnya kanji, kulit kapsul, pelarut, gula, pewarna, perasa, pengawet dan lain-lain.
- (ii) Bahan-bahan eksipien adalah halal jika tidak mengandungi bahan-bahan yang najis, haram, beracun dan berbahaya.
- (iii) Tidak ada pengecualian dalam penggunaan bahan-bahan eksipien tersebut.

g) Penjelasan Mengenai Pengecualian Dalam Penggunaan Ubat-ubatan

Bahan-bahan yang haram dan najis adalah dilarang digunakan sebagai ubat. Walaubagaimanapun dalam keadaan tertentu, di mana tidak ada bahan yang boleh dijadikan ubat bagi mengubati sesuatu penyakit, orang Islam diharuskan mengambil bahan-bahan yang haram untuk pengubatan. Pengecualian dalam hal ini berpandukan kepada nas-nas seperti berikut:

- (i) Surah al-Baqarah ayat 172 - 173- bermaksud:

“Hai orang yang beriman, makanlah barang yang baik-baik dari apa yang diberikan kepada kamu dan bersyukurlah kepada Allah, jika betul kamu hanya beribadat kepadanya. Sesungguhnya Allah hanya mengharamkan kepada kamu memakan bangkai, darah, daging babi dan binatang-binatang yang disembelih tidak kerana Allah, maka barangsiapa dalam keadaan terpaksa dengan tidak sengaja dan tidak melampaui batas, maka tidaklah berdosa baginya (memakan/mengguna

benda-benda yang haram) kerana sesungguhnya Allah Maha Pengampun Lagi Mengasihani”.

(ii) Surah al-Anaam ayat 145 yang bermaksud:

“..... Kemudian sesiapa yang terpaksa (memakannya kerana dharurat) sedang ia tidak menginginiya dan tidak melampaui batas, sesungguhnya Tuhanmu amat pengampun, lagi amat mengasihani”.

(iii) Surah al-Baqarah ayat 195- bermaksud:

“Jangan kamu mencampak diri kamu kepada kebinasaan”.

(iv) Surah al-Maidah ayat 3- bermaksud:

“Diharamkan kepada kamu (memakan) bangkai (binatang yang tidak disembelih), dan darah (yang keluar mengalir), dan daging babi (termasuk semuanya), dan binatang-binatang yang disembelih kerana yang lain dari Allah, dan yang mati tercekik, dan yang mati dipukul, dan yang mati jatuh dari tempat yang tinggi, dan yang mati ditanduk, dan yang mati dimakan binatang buas, kecuali yang sempat kamu sembelih (sebelum habis nyawanya), dan yang disembelih atas nama berhala; dan diharamkan juga) kamu menengok nasib dengan undi batang-batang anak panah. Yang demikian itu adalah perbuatan fasik.

Pada hari ini, orang-orang kafir telah putus asa (daripada memesongkan kamu) dari agama kamu (setelah mereka melihat perkembangan Islam dan umatnya). Sebab itu janganlah kamu takut dan gentar kepada mereka, sebaliknya hendaklah takut dan gentar kepadaku. Pada hari ini, Aku telah sempurnakan bagi kamu agama kamu, dan Aku telah cukupkan nikmatku kepada kamu, dan Aku telah redhakan Islam itu menjadi agama untuk kamu. Maka sesiapa yang terpaksa

kerana kelaparan (memakan benda-benda yang diharamkan) sedang ia tidak cenderung hendak melakukan dosa (maka bolehlah ia memakannya), kerana sesungguhnya Allah Maha Pengampun, lagi Maha Mengasihani”.

(v) Kaedah dalam Islam berbunyi:

“Keadaan terpaksa (dharurat) mengharuskan perkara-perkara yang ditegah.”

Pengecualian dalam penggunaan bahan-bahan haram sebagai ubat, hendaklah menepati syarat-syarat seperti berikut:

- (i) Tidak terdapat atau sukar mendapatkan bahan yang halal untuk mengubati penyakit yang berkaitan.
- (ii) Penggunaan bahan berkenaan hendaklah di bawah arahan dan nasihat doktor.
- (iii) Pengambilan ubat dari bahan yang haram hendaklah sekadar yang diperlukan sahaja.

h) Aspek Kebersihan Dalam Penyediaan Dan Pengendalian Ubat

- (i) Kebersihan amatlah dititikberatkan oleh Islam dan ianya meliputi aspek-aspek kebersihan diri, pakaian, peralatan, premis proses ubat. Tujuannya ialah untuk menjamin bahawa ubat yang dihasilkan adalah tidak berbahaya.
- (ii) Kebersihan boleh diertikan sebagai bebas dari najis, kotoran dan kuman-kuman yang membawa penyakit. Antara beberapa aspek yang ditekankan adalah seperti berikut:

(a) Premis Pengilangan

- i. Mempunyai kawasan mencuci dan membasuh (termasuk tandas) yang cukup untuk pekerja. Ianya perlulah dibina di kawasan yang sesuai di luar kawasan pengeluaran, dan mempunyai sistem pengedaran udara yang berkesan.

- ii. Bilik menukar pakaian perlu ada, dan dilengkapi dengan loker. Bilik menukar pakaian hendaklah bersambung terus dengan kawasan pengeluaran.
- iii. Tidak dibenarkan menyediakan, makan dan minum atau menyimpan makanan dan minuman di dalam kawasan pengeluaran. Aktiviti-aktiviti ini hendaklah dihadkan di dalam kawasan tertentu seperti kantin atau bilik khas di luar kawasan pengeluaran. Kebersihan kawasan ini juga perlu dijaga setiap masa.
- iv. Bahan buangan atau lebihan hendaklah dipungut dan dimasukkan ke dalam bakul sampah bertutup yang sesuai dan dibuang di tempat buangan yang disediakan di luar bangunan atau sebagainya. Pembuangan dan pemusnahannya hendaklah mengikut cara yang betul.
- v. Kawasan pengeluaran hendaklah bebas dari makhluk-makhluk perosak seperti tikus, serangga dan lain-lain yang boleh menjejaskan keluaran. Racun serangga, racun tikus, agen fumigasi dan bahan pencuci sekiranya digunakan, hendaklah dipastikan tidak mencemar peralatan pengeluaran, bahan mentah, keluaran siap dan separuh siap serta peralatan lain yang digunakan dalam pengeluaran.
- vi. Kebersihan kilang mesti sentiasa dipastikan terutamanya dari pencemaran sisa lebihan keluaran yang telah dibuat sebelumnya. Selepas setiap pengeluaran, semua mesin, peralatan dan bilik yang digunakan hendaklah dicuci/dibersihkan sebelum memulakan pengeluaran yang seterusnya.
- vii. Perlu diadakan arahan dan jadual bertulis bagi tatacara pembersihan dan pencucian untuk kawasan pengeluaran, peralatan dan lain-lain.

(b) Peralatan

- i. Semua peralatan yang digunakan hendaklah dicuci di luar dan dalam mengikut prosedur yang ditetapkan. Peralatan yang telah bersih hendaklah disimpan ditempat bersih.
- ii. Sebelum mengguna peralatan tersebut untuk pengilangan seterusnya, pastikan sekali lagi, ianya adalah bersih dan tiada lebihan keluaran yang sebelumnya.
- iii. Penyucian alat-alat tersebut hendaklah dengan menggunakan air bersih.

(c) Pekerja-Pekerja

- i. Semua pekerja perlu diperiksa kesihatannya sebelum diambil bekerja dan setelah bekerja.
- ii. Semua pekerja hendaklah mengamalkan penjagaan kesihatan dan kebersihan diri yang baik, terutamanya bagi mereka yang bekerja sebagai operator pengeluaran.
- iii. Pekerja yang kurang sihat atau mempunyai kecederaan atau luka terbuka yang boleh menjejaskan kualiti sesuatu keluaran, pekerja berkenaan tidak dibenarkan bekerja sehingga pulih.
- iv. Sentuhan secara terus (*direct contact*) di antara tangan pekerja dengan bahan mentah, keluaran separuh siap, atau keluaran pukal hendaklah dihindarkan.
- v. Pekerja perlu membasuh tangan dengan bersih setelah menukar pakaian dan kasut kilang di bilik menukar pakaian sebelum memasuki kawasan pengeluaran. Maklumat bertulis perlu diletakkan di kawasan ini.
- vi. Merokok, makan, minum atau menyimpan makanan, minuman, rokok, ubat dan lain-lain

hendaklah dilakukan di kawasan yang dikhaskan dan tidak dibenarkan di kawasan pengeluaran, makmal atau mana tempat yang boleh menjejaskan kualiti keluaran.

- vii. Mengikut prosedur penjagaan kesihatan dan kebersihan diri semua orang (termasuk pekerja tetap, pekerja sementara, kakitangan pengurusan, pelawat dan lain-lain) yang hendak masuk ke dalam kawasan pengeluaran mestilah memakai pakaian khas untuk kilang.

i) Aspek-Aspek Lain Dalam Penyediaan Dan Pengendalian Ubat

Dalam penyediaan dan pengendalian ubat, perkara-perkara berikut perlu dipatuhi:

- i. Mesti mengandungi kuantiti bahan ubat dalam jumlah yang tepat.
- ii. Tidak dibenarkan mengandungi bahan logam beracun.
- iii. Tidak mengandungi bahan-bahan yang tidak dinyatakan dalam formulasi.
- iv. Tidak menggunakan bahan yang tidak bermutu.
- v. Ubat berkenaan seharusnya dibuktikan keberkesannya.

46. PENUTUP

Dari buku Garis Panduan ini diharapkan dapat memberikan kefahaman mengenai ubat-ubatan yang dijamin baik, bersih dan suci menurut pandangan Islam.

**GARIS PANDUAN
PELAKSANAAN
IBADAH
DI
INTERNATIONAL
SPACE STATION
(ISS)**

GARIS PANDUAN PELAKSANAAN IBADAH DI INTERNATIONAL SPACE STATION, ISS (STESYEN ANGKASA ANTARABANGSA)

47. TUJUAN

Garis Panduan Pelaksanaan Ibadah Di International Space Station, ISS (Stesyen Angkasa Antarabangsa) ini disediakan oleh Jabatan Kemajuan Islam Malaysia untuk dijadikan rujukan kepada angkasawan Islam berkenaan pelaksanaan ibadah di ISS. Dengan adanya garis panduan ini, diharapkan angkasawan Islam dapat memberikan sepenuh tumpuan terhadap penyelidikan di angkasa di samping menunaikan tanggungjawabnya sebagai seorang Islam dengan lancar. Selain itu, ia juga memberikan panduan kepentingan penjagaan al-maqasid al- syariah dalam apa jua keadaan.

48. PENGENALAN

Isu pelaksanaan ibadah di angkasa berbangkit dengan pengumuman kerajaan pada Jun 2003 untuk menghantar angkasawan ke Stesen Angkasa Antarabangsa (ISS).

Pelbagai pandangan dan cadangan telah dikemukakan oleh ahli akademik berkenaan isu ini memandangkan berkemungkinan angkasawan yang akan dihantar ke ISS adalah seorang Islam.

Cara beristinja', menentukan waktu solat, menentukan qiblat, menunaikan solat, menentukan waktu puasa, menguruskan jenazah dan sebagainya telah membangkitkan pelbagai persoalan di kalangan masyarakat.

Sehubungan itu, satu Seminar Islam Dan Kehidupan Di Angkasawan telah dianjurkan oleh Agensi Angkasa Negara (ANGKASA) dengan kerjasama Jabatan Kemajuan Islam Malaysia (JAKIM) pada 25-26 April 2006 bagi tujuan mengenalpasti isu pelaksanaan ibadah di

angkasa dan ISS menurut perspektif Islam dan seterusnya mencari penyelesaian bagi isu-isu tersebut.

49. PELAKSANAAN IBADAH DI ISS

Pelaksanaan ibadah di ISS merangkumi perkara berikut:

a) Cara Beristinja'

Beristinja' adalah dengan menggunakan tisu yang digunapakai di ISS.

Syarat-syarat beristinja' seperti berikut:

- (i) Bahan yang digunakan untuk beristinja' sesuatu yang suci, bukan najis dan bukan bahan yang dihormati.
- (ii) Bahan yang kering.
- (iii) Bahan yang kesat.
- (iv) Bahan yang digunakan tidak kurang daripada tiga seperti tiga biji batu.
- (v) Najis yang keluar belum kering.
- (vi) Najis yang keluar tidak melewati kawasan laluannya.

b) Mengangkat Hadas

(i) Mengangkat Hadas Kecil

Mengangkat hadas kecil adalah dengan bertayammum secara menepuk ISS seperti dinding, cermin dan sebagainya (walaupun tiada debu).

(ii) Mengangkat Hadas Besar

Mengangkat hadas besar adalah dengan cara yang sama di Para 49.b(i).

c) Penentuan Qiblat

Penentuan qiblat adalah mengikut kemampuan berdasarkan urutan berikut:

- (i) Kaabah
- (ii) Unjuran Kaabah
- (iii) Bumi
- (iv) Mana-mana arah.

d) Penentuan Waktu Solat

Lima waktu solat dalam tempoh 24 jam (1 hari di bumi) menggunakan waktu solat tempat terlepas¹ angkasawan.

e) Cara Menunaikan Solat

- (i) Solat boleh ditunaikan secara jama' dan qasar dan tidak perlu *diqada'*.
- (ii) Pelaksanaan rukun *fi'li* (perbuatan) solat adalah dengan mengikat diri angkasawan mengikut kesesuaian keadaan di ISS berdasarkan urutan berikut:
 - (a) Jika tidak berupaya berdiri tegak, hendaklah berdiri secara membongkok.
 - (b) Jika tidak berupaya berdiri, hendaklah secara duduk. Seseorang boleh melakukan ruku' dengan dahinya setentang lutut atau yang lebih utama setentang dengan tempat sujud.
 - (c) Jika tidak berupaya duduk, hendaklah secara berbaring mengiring di atas lambung kanan dan bahagian tubuh menghadap qiblat.
 - (d) Jika tidak berupaya baring, hendaklah secara menelentang.

¹ Dengan penyesuaian untuk kawasan melebihi latitude 45° Utara mengikut buku Kaedah Panduan Falak Syarie terbitan JAKIM.

- (e) Jika tidak berupaya menelentang, hendaklah secara isyarat mata bagi setiap pergerakan solat.
- (f) Jika tidak berupaya juga, hendaklah dengan hati iaitu menggambarkan dirinya berdiri, ruku', sujud dan seterusnya.
- (iii) Pelaksanaan rukun *qawli* (perkataan) solat adalah sama seperti di bumi.

f) Cara Menunaikan Puasa

- (i) Puasa boleh ditunaikan samada di ISS atau di bumi secara *qada'* sekiranya melibatkan bulan Ramadhan.
- (ii) Penentuan waktu puasa adalah menggunakan waktu puasa tempat berlepas angkasawan.

g) Pengurusan Jenazah

- (i) Jenazah perlu dibawa balik ke bumi untuk pengurusan seperti biasa.
- (ii) Sekiranya jenazah tidak boleh dibawa balik, maka diharuskan menyemadikannya di angkasa dengan pengurusan jenazah secara yang ringkas.

50. HAL-HAL BERKAITAN

(a) Pemakanan

Sekiranya makanan yang disediakan diragui halal, maka diharuskan memakannya sekadar mengalas lapar.

(b) Etika Berpakaian

Angkasawan Islam perlu menjaga batasan auratnya iaitu:

- (i) Aurat lelaki adalah di Antara pusat dan lutut.
- (ii) Aurat perempuan adalah selain muka dan dua tapak tangan.

(c) Etika Bermusafir

- (i) Perjalanan ke angkasa merupakan satu musafir yang diharuskan mengikut Islam.
- (ii) Angkasawan perlu menghormati etika bermusafir iaitu;
 - (a) Menjaga kelangsungan hubungan dengan Tuhan.
 - (b) Menjaga keharmonian hubungan sesama makhluk.
 - (c) Menjaga kelestarian alam sekitar.

51. PENUTUP

Adalah diharapkan Garis Panduan ini dapat dipatuhi oleh angkasawan Islam demi memastikan misi penyelidikan di angkasa berjaya di samping mendapat keredhaan Tuhan jua.



Diterbitkan oleh:
JABATAN MUFTI NEGERI PULAU PINANG
Tingkat 48, KOMTAR, 10000 Georgetown, Pulau Pinang.
Tel : 04-263 2975
Faks : 04-263 2985